

„შახტიორი“ (დონეცკი) – „დინამო“ (თბილისი) 3:1 (0:1).

დონეცკი. „შახტიორის“ ცენტრალური სტადიონი. 9 აგვისტო.

„შახტიორი“: ბოლოტნიცკი, დრაგუნოვი, სოპკო (კობოზევი), გოშკოდერია, ლეონოვი (ეგსევი), ოლეფირენკო, იაშჩენკო, სვისტუნი, პეტროვი, სმოლიანილოვი, გრაჩოვი.

„დინამო“: გაბელია, კეტაშვილი, ცვეიბა, ჭელია, არზიანი, რევიშვილი, სვანაძე, სულაქველიძე, ცაავა (ქეცბაია), გურული, გოგიჩაიშვილი.

მსაჯი ა. კირილოვი (მოსკოვი).

გატრთხილება გოგიჩაიშვილი.

დუბლიორები - 1:1. დინამოელთაგან ბურთი გაიტანა თედევმა.

საკავშირო ჩემპიონატის სატურნირო ცხრილში გუნდებს ადგილები განეკუთვნებათ დაგროვილი ქულების მიხედვით. ეს საერთო წესია. მაგრამ, როცა ვლაპარაკობთ ამა თუ იმ გუნდის სამომავლო შესაძლებლობებსა და პერსპექტივებზე მხედველობაში ვღებულობთ არა დაგროვილ, არამედ, პირიქით, დაკარგულ ქულებს, ე. წ. პასივს. ამ თვალსაზრისით დონეცკის „შახტიორს“ და თბილისის „დინამოს“ 9 აგვისტოს მატჩის წინ ასეთი მდგომარეობა იყო: ყველაზე მეტი ქულა დაკარგული ჰქონდა ალმა ათის „კაირატს“ – 27 და შესაბამისად ამისა ერთპიროვნული აუტსაიდერის პოზიციაც მას ეკავა. 3 ქულა დაკარგა ბაქოს „ნეფთჩიმ“, რომელიც „კაირატზე“ მხოლოდ ერთი ადგილით წინ იმყოფებოდა. შემდეგ: 22 ქულის დანაკარგი ჰქონდა მოსკოვის „დინამოს“, 21 – ხარკოვის „მეტალისტს“, 20 – თბილისის „დინამოს“ 19 – 19 მინუს „დინამოს“ და დონეცკის „შახტიორს“.

ამრიგად, ამ უარყოფითი მაჩვენებლებით დონეცკელები ერთი ქულით ჯობდნენ თბილისის „დინამოს“. ამიტომაც, აუტსაიდერთა ამ მატჩს ძალზე დიდი მნიშვნელობა ჰქონდა. თბილისელებს რომ დონეცკში გაემარჯვათ, მათ კვლავ მინუს 20 დარჩებოდათ, ხოლო „შახტიორს“ მინუს 21 ექნებოდა. ე. ი. ეს ის მატჩი იყო, როცა ორივე გუნდი კონკრეტული, უპირველესი ამოცანის წინაშე იმყოფებოდა: მხოლოდ გამარჯვება. იყო, რა თქმა უნდა, მეორე ვარიანტიც, ასევე დამაკმაყოფილებელი თბილისელთათვის – ფრე და მაშინ ზემოხსენებული მინუსიანი მაჩვენებლით შენარჩუნებული იქნებოდა სტატუსკვო, მეტოქეები თითო ქულას ჩაიწერდნენ და რამდენადმე მაინც დასცილდებოდნენ უმაღლესი ლიგის ბოლო ორ ადგილს, რომელიც საგაისოდ I ლიგაში გადასაცვლებას ნიშნავს.

ისიც ყველამ კარგად ვიცოდით, რომ „შახტიორმა“ უკეთ ჩაატარა ბოლო შეხვედრები და 6 შესაძლებლობიდან 5 ქულა აიღო, ხოლო თბილისელებმა ზედმიზეძ გაიმარჯვეს მეორე წრის პირველ ორ სასტარტო მატჩში. ყველაფერი ეს განაპირობებდა ამ მატჩის უდიდეს დაძაბულობას, მის მნიშვნელობას. დინამოელებმა დიდი მონდომებით, მეტოქეზე უკეთ ჩაატარეს პირველი ტაიმი. დონეცკში, „დინამოს“, საერთოდ საერთოდ უჭირს თამაში, მაგრამ ამ მატჩში ჩვენმა გუნდმა პირველი 45 წუთის მანძილზე შეძლო დონეცკელთა იერიშების უვნებელყოფა, მცველებმა კარგად გაართვეს თავი მეტოქის შეტევებს, თავდამსხმელები კი ყოველ შესაძლებელ შემთხვევას კარგად იყენებდნენ კონტრიერიშებისთვის.

ასეთ საიმედო თამაშში მიმდინარეობდა 34-ე წუთი, გოგიჩაიშვილი სწრაფად გავიდა გარღვევაზე, საჯარიმო მოედანზე მას უხეშად ეთამაშა ლეონოვი და მსაჯმა

კირილოვმა დაუყოვნებლივ დანიშნა 11-მეტრიანი. გურულმა ზუსტად, ძლიერად დაარტყა – 1:0.

არამართო ანგარიში, არამედ თვით თამაშის მსვლელობა ცხადყოფდა თბილისელთა კარგ ფორმას ამ მატჩში, ისინი ენერგულად იბრძოდნენ თუ გამარჯვებისთვის არა, ერთი ქულისთვის მაინც.

მაგრამ დაიწყო მეორე ტაიმი, ბრძოლა მაშინვე უკიდურესად გამძაფრდა და ცხადი შეიქმნა, რომ თბილისელები ფიზიკური მომზადებით ჯერ კიდევ მზად არ არიან ამგვარ ურთულეს მატჩებში წარმატების მისაღწევად. დიდ დატვირთვებს მათ ვერ გაუძლეს. დონეცკელმა ფეხბურთელებმა პირველივე წუთებიდან მძაფრი იერიშები მიიტანეს გაბელიას კარზე. შეტევა შეტევას მოსდევდა, სტუმრებს სულ უფრო და უფრო უჭირდათ გრაჩოვის, გომკოდერიას, სმოლიანინოვის, პეტროვის და სხვათა შემტევი თამაშის ნეიტრალიზება. ბურთი სულ უფრო იშვიათად გადადიოდა „შახტიორის“ ნახევარზე. დინამოელებმა ვერ შეძლეს აქტიური კონტრათამაშის შექმნა, ისინი მხოლოდ თავს იცავდნენ, მართოდენ დაცვითი თამაშით კი მათ ძალზე გაუჭირდათ ბრძოლა.

მიმდინარეობდა 62-ე წუთი და მსაჯმა კვლავ დანიშნა 11-მეტრიანი, ამჯერად დინამოელთა კარში. პეტროვმა გაათანაბრა ანგარიში. მცირე ხანს შემდეგ კი თბილისელთა საჭარიმო მოედანში უკიდურესად მწვავე სიტუაცია შეიქმნა, რომელიც იმავე პეტროვის გატანილი მეორე გოლით დასრულდა – 2:1.

მხოლოდ მაშინ, როცა „შახტიორის“ ფეხბურთელებმა თავიანთ სასარგებლოდ შეატრიალეს მატჩის მსვლელობა, „დინამომ“ სცადა კონტრათამაშის შექმნა, ამის გაკეთება კი გაცილებით ადრე იყო საჭირო, კერძოდ, მეორე ტაიმის დასაწყისიდანვე. მასპინძელთა კართან ზედიზედ შეიქმნა სახიფათო მომენტები, გურულმა ძელს მოახვედრა გოგიჩაიშვილისაგან მიღებული ბურთი, შემდეგ კარში დაარტყა შემცველად გამოსულმა ფანცულაიამ. დინამოელთა იერიშები გაგრძელდა და 85-ე წუთზე კულმინაციური მომენტი დადგა: დონეცკელთა კართან გაიჭრა გურული, მეკარე ზოლოტნიცკიმ იგი ხელით დაიჭირა და არბიტრმა, უკვე მესამედ ამ მატჩში, კვლავ 11-მეტრიანზე მიუთითა.

თამაშის დამთავრებას 5 წუთი აკლდა, „დინამოს“ საშუალება მიეცა გაეთანაბრებინა ანგარიში და თავი ეხსნა დამარცხებისაგან. ეს იყო მატჩის ხსნის საუკეთესო შესაძლებლობა, გუნდმაც დარტყმა გამოცდილ პენალტისტს გურულს მიანდო. ყველაფერი აქ შეიძლება გადაწყვეტილიყო, მაგრამ გურულს ნერვებმა უმტყუნა, ვერ შეძლო 11-მეტრიანის გამოყენება (ზოლოტნიცკიმ მოიგერია ბურთი), ხოლო ორიოდ წუთის შემდეგ როცა სვისტუნმა კიდევ ერთი ბურთი გაიტანა „დინამოს“ კარში, მატჩის ბედიც საბოლოოდ გადაწყდა – 3:1.

ახლა დონეცკის „შახტიორმა“ თბილისის „დინამოსთან“ შედარებით კიდევ უფრო გაიუმჯობესა მდგომარეობა. ჩვენი გუნდის პერსპექტივა ჯერ კიდევ ბურუსითაა მოსილი. წინაა უძნელესი მატჩები დნეპროპეტროვსკის „დნეპრთან“ და მოსკოვის „დინამოსთან“. პრობლემა აქაც უამრავია, მართო ერთი ტაიმის მოგება არაფერს ნიშნავს, ბრძოლა საჭიროა მთელი 90 წუთის მანძილზე, ბრძოლა დაუღალავი, შეუსვენებელი. თითოეულ დინამოელს, კვლავ და კვლავ ვიმეორებთ, კარგად უნდა ახსოვდეს, რომ უმაღლეს ლიგაში ადგილის შესანარჩუნებლად უშეღავათო თამაში

საჭიროა. სწორედ ახლა, ვინაიდან ჩემპიონატის ფინიშზე სიძნელები კიდევ უფრო მოიმატებს. ამ სიძნელებს კი ჩვენი გუნდი სრულ მზადყოფნაში უნდა შეხვდეს.  
„ლელოს“ ფეხბურთის განყოფილება

ლელო 11.08.88